

ЕВСЕВЬЕВСКАЯ ОТКРЫТАЯ ОЛИМПИАДА ШКОЛЬНИКОВ
2016-2017 учебный год

=====

ЗАДАНИЯ ОТБОРОЧНОГО ЭТАПА ПО РОДНОЙ ЛИТЕРАТУРЕ (ЭРЗЯ)
ДЛЯ УЧАЩИХСЯ 7 КЛАССА

1. Текстнэнь теемс литературоведческой анализ (прозань или поэзиянь саеви тонавтницянтэ эсь мелензэ коряс)

М. Кемаль

А янксян, а тердян, а авардян,
Пингем тусь, прок валскень стямсто сув.
Сексень поекс пизем ало тардян –
Мештесэм ней аволь тундонь увт.

Тон ней састо виренть эйсэ пансят,
Кельмсэ чавозь, пужозь седеем.
Ды а тердить эйсэм лаймот-паксят.
Кепе чийнемс ней арась мелем.

Ней чуросто бажан мон ливтнеме.
Пингень ким! Тон, паряк, он ульнить?
Марявсь монень: чиньстямов кивтеме
Мон лишмесэ ардынть ды кольнинь.

Сёксесь кармась сырнесэ певтеме
Эрва шканть мазынзэ вечктяно.
Кадык ули Пазонь чансть сетненень,
Кие сась те пингенть печтямо

Фёдор Маркелович Чесноков
Ояз Мика (Ёвтнема)

1

Тевесь ульнесь кизна, кочкома ланга. Микань саизе авазо чиньжарамонь мотыжамо. Пек паро ульнесь Микань мельс: мольсь сонзэ мелезэ кудосо аштезь.

Веленть маласо меньгак вирь арасель, арасель леесткак, экшелямс а косо ульнесь. Чоп яла Мика пуль потсо налксекшнесь ялганзо марто. Аштемадо лиясто велень омбоце пев молилль. Лисевель, лисевель веле ушов - пели, кадови, мейле кудоськак а муеви.

Сыргасть аванзо марто стададо мейле сеск. Мика кандсь кши, авазо - веть марто кукшин ды мотыга. Кирнявтнезь моли Мика, а ёвтавияк, кода кецясь.

Лиссть веле ушов. Розтне уш пря каякшность. Сэрест Микадо аламодо алкинеть. Вармась яхой розтнень эйсэ, весе паксясь неяви прок пиже иневедь. Чии Мика аванзо икеле, сови розь потс, учосы аванзо. Ансяк пачкоди авазо корязонзо, сон, кивчк! лиси розь потсто, истя тандавтни аванзо. Таго напусти икелев.

Пачкодсть яровой паксяв. Муизь умаст. Авазо кармась мотыжамо. Мика несъ мазый нимилявт, кармась мельгаст чийнеме ды кундсеме. Кодат ансяк эзь кундсе: кона-кона нимилявось ванькс ашо, кона сёрмав, кона розовой марто ашо. «Бмзз!» - пижнеть промот, чарасть Мика велькска, сон яла кундси эйсэст.

Аволь васоло неявсь сэрей вирь. Арасель Мика вирьсэ вестькак. Мани виресь эйсэнзэ. Натой тантей экше пуви тосто. Сыргиксэль, авазо неIZE, эзизе нолда. «Ялатеке молян», - арсесь эсь пачканзо Мика. Чикуншка малав Микань кармась мокеме мелезэ. Псись крутизе - а мезть тейнемс, а козонь кекшемс. Кармамс авардеме, мейле авазо кежиявты, ковгак а сайсы. Вешнесъ ума ланга налкшкетъ, таго карвотне а кадыть. Авазояк озась ярасамо. Ярсасъ-тейсь, мадсь оймсеме. Сизекшнесъ пек, курок матедевсь. Те шкане Мика арсесь сыргамо вирев. «Удомазонзо велявтан мекев, синдтрян тосто лопап тарадт, кочкан кстыить ды сан», - арсесь сон эсь пачканзо. Салава-салава, пильге сур лангсо тусъ. Сонсь яла ваны удалов, фатясь-эзь авазо.

Пачкодсь вирентень. Тесэ экше кошт. Маряви тантей чине. Мика кецясь, кармась седе курок тарадонь синдтреме. Неявить мазый цецят.

Совась седе потс. Марявить морамодо нармунть. Мика яла ваны верев: неевлизе, кодамо нармунь моры. Комась - пильгалонзо кстыить. Кармась кочкамо. Тей ёртови, тов ёртови, седеяк яла покшт ды якстереть понгить. Сон пель картуз кочкась.

Эзь фатяк, лиссь покш кужос. Кепедизе прынзо, стувтызе, коволдо сась. Мекев тензэ сыргама, а соды коволов. Васня аварьгадыксэль, кстыить неявить, истят якстереть, кодат сон эзь мукшнояк - лоткась, таго кармась кочкамо. Весе картузонзо пештизе. Стувтызе авардеманзояк. Ней станов эряви модемс.

Симемазо сась, седе а ков. Яла моли, яла моли. Виренть пезэ а машты. Ков моли, виресь яла седеяк сэрей ды эчке. Пачкодсь латко чирес. Латкосъ келей, валгомс васоло. Велявтоманзо мекев пельсь. Валгсь латконтень. Совась цитерькс потс. Яла валги алов. Чи валдо косяк а неяви. Потмаксонтъ натой чопода. Мика кармась пелеме. Марясы, мезе-бути шольни. «Те мезе?» - арси Мика эсь пачканзо, мекев кармиксэль куземе, нолажтсь, кеверсь потмаксов. Понгсь лисьминес. Чуди ведь, истямо ванькс, прок сиянь. Комась Мика симеме. Симсь, таго кармась куземе. Кстыйтнень яла а кадсынзе. «Кандсынъ аванень, сон седе сёвномо а карми», - арсесь цёрынесъ. Латкстонть лиссь. Яла моли, яла моли. Виренть пезэ а машты.

Фатясь Мика, тевтне кальдявт - кадовсь. Авазо ней а муеви. Кода уракады вирень келес.

- Авай, авай! - кармась пижнеме Мика.

- Авай, авай! - сеери вайгелезэ виренть омбоце пестэ.

Маризе Мика те вайгеленть, кармась пелеме: кие-бути дразни эйсэнзэ. Кармась рангомо. Чудить петерьсэ сельведензэ кстыйтнень лангс.

Кармась чопотеме. Кекшьс чизэ виренть тона пелев. Чополгадомо кармась виреськак. Стясь варма. Шалакадсть тумотне, увныть пичетне. Мика яла аварди. Пижнесь, пижнесь, вайгелезэяк кармась маштомо. Виресь яла седеяк чополгады. Ломань вайгель костояк а маряви. Кармась сиземе, пекезэ вачсь. Зярыяксть пупордясь пенька ланга. Кстыйтне пелест валовсть, певерсть. Ансяк озыксэль, марясы, мезе-бути пижни: «У-у... ууу!».

Мика кармась сорномо. Таго маряви: ууу!... ууу! Весе потмозо Микань соракадсь, натой кармась кельмеме. Таго яла маряви пижнема. Истя пижнесь покш пря корш. Мика эзь чарькоде.

Ваны Мика икелев. Валдо. Сыргась товолов. Лиссь кужос. Неявить мень-бути раужо куцят. Молевель-молевель эйзэст, паряк, неть кудот - пели. Пекезэ вачсь седе а ков. Мольсь. Нерьгстазь нерьгставсь тикше куцяс. Пек лембекс сынь марявсть Миканень. Лоткась, кармась карамо варя. Истя сынь олго омётс кекшнильть пивсэмстэ. Эцесь тозонь, кстыйтнень сэвинзе, мадсь. «Тестэ мезеяк а мусамам», - арсесь сон эсь пачканзо.

Лембе. Сизесь пек. Сеск матедевсь. Виресь яла шалны, цятордсть велькссэнзэ тумотне, нармунтне морасть морот. Мейле весе оймасть. А куш а каш. Мика онстонзо бреди. Сон кстыйтнень кандынзе аванстэнь. Васня авазо чавиксэлизе оргодеманть кис, мейле неинзе кедьстэнзэ кстыйтнень, пейдезевсь, кармась прянзо вадяшамо. Пелест ка-дызь кудов, тетянстэнь.

Стясь авазо оймсемстэ, ваны - Мика арась. Тей варшты - Мика а неяви, тов серьгеди - Мика а маряви. Седейнензэ сезизе. Тусь, нать, яралашась вирев. Авась чийсь тов. Тов эшкеви - арась, тей варцодеви - арась. Кармась сеереме. Меньгак вайгель кияк а максы каршонзо. Муинзе синдтрезь тарадтнэнь. Сон тесэ ульнесь. Кармась вирьганть чийнеме. Яла пижни, яла пижни, Мика а маряви. Кода карми лайшеме. Марявлизэяк Мика вайгелензэ - тандадоволь. Сонсь аварди, сонсь вешни. Кувать истя чийнесь. Потмов совамонзо пельсь. Кармась пижнеме мезе вийсэ. Гайги виресь, лайши аванть марто. Мика а маряви костояк.

Каладсь аванть седеезэ. Курок чопоти. Тусь чиезь авазо паксянь-паксянь трокс кудов ёвтамо. Капши. Ливтязь ливтяволь - сизесь пильгтне, а кунсолыть. Седе курок ёвтамс тетянстэнь, ёвтамс весе велентень.

Кода марясь тетязо, прок коняс лоштявсь. Абунгадсь. Мейле капшазь лиссь, озась ласте ды тусь Советэв ёвтамо. Авазо кадовсь кенкш поровт лангс, оймезэ кодаяк а таргави. Паро ёжо кодаяк тензэ а сы.

Весе велесь сырғась Микань вешнеме вензэ лангс. Эзть кадо вейкеяк латко, эзть кадо паксяс тарка. Вирьгантькак ламо якасть. Мика эзь муеве.

Авазо прась сэредеме. Тетязо тусь якамо веле-веле ланга.

Кияк ней эзь учо Микань эйсэ живстэ. Кулы вачодо козоньгак эли повасы верьгиз.

Сыргозсь Мика, панжинзе сельмензэ. Лангсонзо тикшеть. Эжди эйсэнзэ чись. Ванкшны кавто пелев, а чарькоди, кода истя сон понгсь вирев, мейс сон тесэ. Учось сон пси модамарть рошксе марто. Ней вакссонзо кияк арась. Варшты тей, варшты тов - меньгак ломань а неяви. Каштмоли виресь. Меньгак варма арась. Варштась Мика пильгалонзо. Таркасонзо менчевсь гуй. Цимболды чинть каршо весе лангозо. Мазыекс неявсь Миканень те карксось. Васня Мика кармиксэль авардеме, ней авардеманзояк стувтызе. Кармась гуенть эйсэ токшеме. Сон чаракстомсь. Мика кундызе пулодо. Гуесь мендявсь сонзэ пелев, лоштизе чама ланга.

Цимболды гуенть тюжа прязо чинть каршо.

Мика кармась мартонзо налксеме. Кода ансяк эзь менчеве гуесь! Мика кундызе кирьгадо, ваны нерезэнзэ. Гуесь келензэ каршонзо ливтизе, Микаяк кармась дразнямонзо, кармась каршонзо келензэ ливтнеме.

«Эх, ней бу Михалка (ялгазо) улевельгак тесэ, кавоненек налксевлинек гуенть марто», - арсесь Мика. Стувтызе кудов молеманзояк. Совась таго вирентень, тосо седе экше. Пекезэ вачсь. Ней бу кшиде ярсамс. Авазо пек тантей рошксеть пани. Кармась кстыень вешнеме. Васов таго тусь, кстыень кочказь. Маряви, кие-бути кашторды. Мика тандадсь, лекшкадсь куро алов, кунсолы.

Цятор, цятор! - марявить тарадтнэ. Сась малазонзо кискань кондымо, пондакш, покш. Мика стиксэль маньямонзо. Мольсь малазонзо верьгиз. Ваньить карадо каршо.

Микань оймезэяк кочкаряс тусь. Пели, чаманзо аволизе сявта.

Седеяк малас сась верьгизэсь, никси Микань эйсэ. Мика оймензэяк а таргси. Ванкшнызе-теизе верьгизэсь, кармась туеме. Самай те шкастонтъ сеське Микань коняс пупизе. Кежензэ састь, кода цямкадизе конянзо, лакшт ансяк тейсь конясь. Верьгизэсь кода маризе лакштядеманть - теке неевтезэ. Мика мельганзо пижнесь.

Кармась поцердеме пиземе. Мика кепедизе прянзо, менеленть эйсэ копачить раужо пельть. Ансяк ве пестэ неяви цють валдо.

Маряви, виресь кармась лажномо. Кепететсь варма. Ушось кармась чополгадомо. Уру... ру... ру! - зэркстась мезе вийсэ пурьгинесь. Мика озавсь. Чиезь туевель - а стяви. Кивчк! - верьгедсь ёндо. Толось прок Микань икельга ютась. Весе виренть валдомтызе. Мельганзо седеяк виевстэ серьгедсь пурьгине. Лаж... ж! - ледсь малазонзо. Цятор! - сивсь килеесь, кона ульнесь аволь васоло. Мика мезе вийсэ пижакадсь. Таго серьгедсь пурьгине. Кармась валомо пиземе. Мика лекшкадсь куракш алов.

Пиземесь яла кери. Мика начксь прок левштапо. Весе пуленть лангстонзо шлизе пиземесь.

Кармась валдомомо, пиземесь лоткась. Мика стясь сяворезь килеенть ваномо. Килеенть керезэ прок нарошной ватказь, лопанзо пужсть.

Чись таго кармась эждеме ды костямо Микань эйсэ.

- Улю!.. Улю! - марясь вайгель виренть келес.

Мика лоткась, ваны, кода ваксканзо ноцорды секе верьгизэсь, цють Микань эзизе сяворде. Мельганзо ардыть колмо кискат. Мика тандадсь ды велявтьсь вирь потс. Аволь ламо шкань ютазь чийсть колмо ломанть, кедьсэст ологат. Мика седеяк тандадсь, кекшсь тумо алов.

«Неть машттадызь, - арьсесь сон эсь пачканзо. - Бабам ёвтнесь яла, кода вирьсэ беглойть эрясть. Сынъ кундсесть ломанть».

Чициятне тусть. Мика те таркастонть чийсь лия таркав. Пачкодсь вирь крайс. Пакся. Мика сыргась тов. Моли ряд киява, вармась пувси эйсэнзэ. Ве пельде неявить ломанть. Малазост молемадонть Мика пельсь. Вансь, вансь лангозост, тусь ряд киява. Каршонзо лиссь ашо-сёрмав киска, кармась перьканзо чарамо. Мика кармась ладсемензэ. Кискась педясь мартонзо. Молить, кольнить, сасыть вейкест вейкест. Таго ве пельде неявить мотыжицят. Мика эзь фатяяк, кода кискась ёматотсь эйтэнзэ. Кармась сон мезе вий вешкеме, манямонзо.

Кискась маризе. Межань-межань трокс ардсь эйзэнзэ, кургсонзо пель кши. Пачкодсь малазонзо, лоткась. Кшинть каизе кургстонзо, сонсь стакасто лекси.

Мика кецясь ды эрязасто габордызе кшинть.

Эзь кенере варштамо, эйзэст уш чиить мотыга марто ават, сынсь пижнить минень-сюонь вайгельсэ. Мика тусь чиезь. Кискась мартонзо.

- Кундак! Кундак! - пижнить аватне.

- Товолдо! Товолдо!

Вейке авась цють эзизе саса. Ансяк кармась кундамонзо, велявтьсь кискась, каявиксэль аванть лангс.

Авась тандадсь, прась. Мика оргодсь...

Окойники Микань кадызь.

Мика апак лотксе чийсь витьстэ вирев. Кискась уш тосо учи эйсэнзэ, сэрьганзо кирнявтни. Озасть кавонест экше таркас, кармасть кшиденть ярсамо.

Мика кисканть марто кутмордазь мадсть куро алов.

Тон, Песряк, таго кши салак, - кортась Мика кисканть, - минь мейле киненьгак а понгтано. - Истя кортазь матедевсть кавонест...

Таго чопотетсь. Ледсь Микань мельс кудось. Саизе тошна, кармась авардеме. Кискась вансь-вансь лангозонзо, кармась урномо. Кияк а маряви маласо. Каштмоли виресь.

Лопатнеяк тарск а теить. Ванить верде лангозост чувттнэ, мезтькак а кортыть. Пек ней Мика ярсаволь бу чапамо ловсо марто кашадо, а мейле мадевель.

Куш авардть куш иля, ялатеке кияк а марятанзат. Лоткась Мика авардемадо. Кармась Песряконь марто кортамо.

- Песряк, кудонть содасак коволо? - кевкстни Мика кисканть.

Песряк ваны сельмезэнзэ, пулосонзо юрновтни.

- Адя валске кудов, монь мелем мольсь... Тосо парсте ярстано, мейле таго вирев...

Песряк яла ваны, прок кунсолы эйсэнзэ ды чарькодъсы.

Эх, Песряк, монь авам пек тантей модамартъ пиди... Молиндерятано, ярстано...

Песрякось кармась пилензэ эйсэ кепсеме. Маряви кие-бути каштордомадо. Вансызь, эйзэст цитерькс потмова моли скал. Песряк каявсь лангозонзо. Мика чиезь тусь мельгаст.

Басов истя чийсть. Скалось ливтинзе паксяс. Ве пельде неявить толт.

Песряк мекев велявтсь Миканень. Марявить, онгить кискат. «Те аволь минек велесь», - корты эсь пачканзо Мика.

- Аволь тесэ авам, - пшкадсь Песряконтень Мика.

Кармась молеме малав. Марявить морыцят. Ульцясо шалт моли. Тыр-лар, тыр-лар - марявить гармоният. Кискатне а лоткситькак онгомадо. Песряк а кадови Микань эйстэ. Пачкодсть тинге пире видьс.

Велев совамонзо Мика пельсь. Песряк марто совасть пирес, прасть олго лангс, матедевсть.

Валскень экшесь стявтынзе. Сыргасть велев. Чизэ умок уш лисекшнесь, кузьс колмошка чувтонь сэръ. Лей чирева, алга, ютась ашо сув.

Ульця куншкасо налксить эйкакшт. Мика мольсь малазост. Песряк яла а кадови эйстэнзэ. Кунсолить, Мика мезеяк а чарькоди. Эйкакштнэ фатясть эйзэст, пиризь. Мезть - бути лабордыть кувалмаст.

- Кши! - ансяк пшкадевьс Мика.

Песрякоськак кармась пулосонзо аволямо. Эйкакштнэ кармасть Мика лангсо ракамо. Седе покшось эйстэст тулкадизе Микань. Песряк кода каяви лангозонзо. Чавицянть теке неевтезэ. Мика Песряконь серьгедизе мекев. Мольсть малазост ават, ваныть Микань лангс.

- Чей будешь, мальчик? - кевкстизе вейке авась. Мика каштмоли, ваны сельмезэнзэ, мезеяк а чарькоди.

Таго кармасть кевкстнемензэ. Мика мезеяк а чарькоди. Кармась вадяшкавтнеме Песряконь эйсэ.

- Как зовут тебя? - таго кевкстизь Микань.

- Кши нет, - ансяк мусь меремс Мика.

Нетъ валтнэнь сон маринзе аванзо кургсто. Аватнеяк кармасть ракамо. Мика уш туиксэль юткстост: мейс ракий лангсонзо.

- Адя, Песряк, - пшкадсь кискантень.

Песряк стясь. Мольсь малазонзо цёра, саиксэлизе кедте. Мика тандадсь.

- Песряк, узы! - серьгедсь тандадомань пачк. Песрякось каявсь церанть лангс.

- Смотри-ка какой... Не скоро его возьмешь, - кортыть рузтнэ.

- Есть хочешь? - сэтьместэ кевкстизе сыре бабине. Мика кармась сельмензэ эйсэ кончтнеме. Меревель, меревель - мезеяк а соды. Кармась авардеме. Бабинесь саизе кудов. Песряк мельгаст. Каясь бабинесь Миканень ловсо, путсь кши. Курок Мика фатясь, кармась ярсамо. Кискась ваны лангозонзо вальмава, сельмензэ лип а теить. Мика ёртсь тензэ печть кши. Песряккак кармась ярсамо.

- Смотри-ка, и собаку не оставляет, - пейди бабинесь.

Мика таго салава ёртсь кискантень печь. Тона сеске каподизе сонзэ. Пешкедсь Микань пекезэ, сырмиксэль ушов. Бабинесь лоткавтызе:

- Ты куда, парень?

Мика а кунсолыяк, уцорсо лиси. Кискась уш учи эйсэнзэ. Бабинесь а нолды.

Ты чей будешь? - кевкстизе бабась.

А ярсан, - пшкадсь Мика, кармась невтнеме виренть пелев.

Бабинесь ветизе Советэв. Тосо таго кармасть эйсэнзэ кевкстнеме. Мика каштмоли. Вейке уш кежейстэ кармась пижнеме. Мика габордась кев, серьгедизе Песряконь. Атятне раказевсть.

Кода эзь кевкстне, Мика мезтькак а корты. Сельмень тетъкезь яла вансь рузтнэнь лангс.

- А ярсан, - пшкадсь меельце пелев. Ансяк обед малав Мика мерсь: - Кши.

Рузтнэ чарькодсть, таго андызь. Мейле Микань ускизь волостев. Тосо уш содасть сондензэ. Весе велетнева вешнесть эйсэнзэ. Песряк яла мартонзо, вакс а кадови эйтэнзэ.

Волостьсэ полонявсь эрзянь атя, кармась Мика марто кортамо.

- Покштяй, нолдамизь мекев, - кортась Мика атянтень. - Кода пекенек вачи, минь сатано тей.

Атясь раки лангсонзо.

- Адя, цёркай, кудов, тосо ават кисэть ризнэзь ормалгадсь.

Ускизь Микань кудов кисканзо марто. Комсьветее вайгельбетъ ютась Мика съкамонзо.

Ялганзо ней мерить тензэ Ояз. Песрякось кадовсь Микамезень кедьс, ней сынъ кавонест.

2. ТВОРЧЕСКОЙ ЗАДАНИЯ

Сермадомс евтнема «Авань вечкема» теманть коряс. (Евтнемантень совавтодо истят вал: тиринь, лембе кедть, лембе седей, мазый ойме, чевте вайгель, ды лия валт эсь меленк коряс). Покшолмазо 200 валт.

Питнесь путневи

1 заданиясь:

1. Важдемась (произведениянь литературоведческой анализэсь) композиционна арсезь педэ пев 25 балл. Питнесь путневи истямо шкалань коряс - 0-8-16-25

2. Важдемасонтъ видестэ маштозь цитатань нолдамось. Пелькстнэ (абзацтнэ) эсь ютковаст логически сюлмазь - 20 балл. Питнесь путневи истямо шкалань коряс - 0-7-14-20

3. Важодемасонть теоретико-литературной чарькодематнень видестэ нолдамось - 10 балл

4. Важодемасонть изобразительно-выразительной средстватнень видестэ тешкстамось (лексическойтнень ды синтаксическойть). Орфографиянь ды пунктуациянь норматнень коряс видестэ сёрмадомась. Бути текстсэнтэ нолдазь колмодо ламо ильведевкст то путови 0 балл – 10 баллт. Питнесь путневи истямо шкалань коряс – 0 - 4-7-10.

Весемезэ – 65 балл

2 заданиясь. Творческой задания

1 Кармавтомасонть максозь валтнэнень ды валсюлмотнень маштозь тевс нолдамось – 1 балл эрьва валонть кисэ. Весемезэ 10 баллт.

2. Теоретико-литературной чарькодематнень содамоств ды маштозь тевс нолдамоств. Весемезэ 5 баллт.

3. Маштозь, тевень содазь жанрань кочкамось. Весемезэ 5 баллт.

4. Важодемасонть пелькстнэнь ютксо сюлмавомась, синтаксической конструкциятнесэ, келень ды кортамонь сюпавчись. Весемезэ 5 баллт.

5. Важодемась весемеде пек явовиця, сюжетэнь ды композициянь коряс домка смустев. Весемезэ – 10 баллт. Весемезэ – 35 баллт.